

Pastor Lampe a remarca cu:

No tin Democracia si no tin husticia ni paz unda ley no ta conta pa tur hende igual!

ORANJESTAD (AAN) -- Pader Lampe a referi na conceptonan equivoca cu tin di violencia, y den e mesun rosea el a elabora riba inhusticia y falta di democracia como violencia, maske cu no tur hende ta reconoce esey. El a acentua tambe cu no por tin paz unda cu no tin husticia.

Esaki semper dentro di su e contexto di su discurso amplio na Biblioteca Nacional, riba e tema di Paz.

Pa hopi hende violencia ta sinonimo di scopet y bala, loke aisladamente ta un concepto robes di violencia, segun opinion di Pader Lampe, y esaki den sentido cu violencia no ta esey so, pasobra tambe ta existi violencia verbal, violencia emocional, ademas di violencia fisico.

"Inhusticia ta violencia, aunque hopi biaha hende no ta pensa riba e nivel ey. Falta di democracia ta violencia.

Ora cu nos pensa pues riba violencia na un nivel cu solamente nos ta vincule cu arma y criminalidad, esey ta un concepcion asina reduci cu nos mester amplia nos concepcion.

Pakico inhusticia, falta di democracia, nos por caracterice como violencia?"

Riba e pregunta aki Pader Lampe a bisa cu na momento cu na hopi pais hendenan ta reacciona contra

falta di democracia y contra inhusticia, nan ta worde tilda di ta violento y rebelde, pero no ta wak kico ta origina e reaccion.

Pa loke ta trata e situacion na Aruba mes, segun Pastor Lampe ta bisto cu nos democracia no ta funciona, y podernan ta separa di otro. El a referi na e caso reciente, cu representantenan di gobierno a bisa cierto sindicalistanan pa nan bay huez, y un lider sindical a responde: "nos no ta bay huez pasobra nos no tin confianza mas den nos hueznan", palabranan cu a zona hopi duro, pero cu tin su motibo pa nan a worde expresa.

Pastor Lampe a duna otro ehemplo, y esey ta dia cu Parlamento a aproba e ley di dividendo. Esey Pastor ta mire como e violacion di un principio basico di nos constitucion, a bay contra legalidad siendo Parlamento e organo basico cu mester defende nos legalidad.

Segun e sacerdote, falta di democracia unda cu e podernan ya ta separa di otro ta violencia, y ta pesey cu Iglesia Catolico semper ta vincula paz cu husticia, y esey ta un concepto clave.

El a menciona cu el a skirbi un buki yama "Paz Husto" unda e ta trata di vincula e dos conceptionan di paz y husticia, pasobra no por tin paz si no tin husticia, y no por canta paz prome cu tin husticia;

tampoco por tin paz unda democracia ta worde desvincula di husticia.

Pastor Lampe a expresa cu mescos cu tin un concepto negativo y uno positivo di conflicto, tin un concepto negativo y uno positivo di paz.

CONCEPTO NEGATIVO DI PAZ:

E concepto negativo di paz ta paz como ausencia di guerra.

Pa ilustra esaki cu un ehemplo, Pastor Lampe a corda loke a sosode aña pasa, ora a crea conflicto rond di e proyecto di race-track cu no ta pueblo a bin cune.

El a corda momento cu e grupo di defensa di medio ambiente a presenta dilanti Oficina di Gobierno, pa entrega un manifiesto cerca Prome Ministro, cual te anochi laat no a bin tume.

"Via cellular mi a papia cu Prome Ministro y mi a dune mi palabra cu si e manda un representante pa tuma e manifiesto, pasobra ya ta anochi caba, mi ta duna bo mi palabra di honor cu nos ta bay pacificamente for di dilanti Bestuurskantoor.

E tambe a duna mi su palabra di honor..." Pastor Lampe a conta, y a agrega cu despues cu a caba di papia cu otro, autoridad policial a haya ordo pa pone man riba e manifestantenan.

E siguiente dia a worde bisa cu danki na polis paz a worde restablece na Aruba: "pero...ki clase di concepto esey ta? Esey ta paz a base di trampa", el a expresa, agregando cu esey no ta paz positivo, pero negativo. Esey ta paz di ausencia di guerra, unda cu tur cos riba caya tabata tranquil, pero e conflicto a sigui sin cu el a worde resolvi.

CONCEPTO POSITIVO DI PAZ:

E concepto positivo di paz ta encera den un palabra Hebreo cu kiermen armonia, husticia, bon relacion cu bo prohimo, respet pa medio ambiente, y tur loke ta positivo unda no solamente no tin guerra pero husticia ta worde realiza.

"Tur esey ta encera e concepto positivo di paz, y pesey mes ora cu nos habri nos mente pa un concepto mucho mas rico y mas amplio di paz, e ora ey nos tin cu protege nos mes di hopi cos cu ta pasa na America Latino, den nos mesun pais, y den nos mundo", e sacerdote a bisa.

Na final Pastor Lampe a comenta cu pa logra paz den nos pais, nos tin cu protege nos mes di hopi cos cu ta pasando na mundo, y por ehemplo na America Latina, cu ta genera violencia.

El a acentua cu violencia ta surgi den e mesun comunidad, y esey ora cu e comunidad mes ta mira inhusticia ta worde cometi, por ehemplo ora un hende di pueblo ta ser castiga pasobra el a falta respet di autoridad, pero ora autoridad (gobernante por ehemplo) ta falta respet di un ciudadano comun, ley no ta conta mescos pe.

Pastor Lampe a ricibi hopi aplauso di e gran mayoria di e publico presente, pero por a ripara cu ni un di e Parlamentarionan cu tabata tey a bati man pe, y na final Presidente di Parlamento evidentemente disgusta, a acerca Pastor Lampe pa "manera hala su oreca" mescos cu mucha chiquito.